

SAKARAIA

1

2

3

4

5

6

7

8

9

10

11

12

13

14

CHAPTER 1

Ena i ka walu ni vula ni karua ni yabaki nei Taraiasi, sa yaco mai na vosa i Jiova vei Sakaraia na parofita na luvei Parakaia na luvei Ito ka vaka,

² "Sa cudru vakalevu sara o Jiova vei ira na nomudou qase.

³ "Mo tukuna vei ira, 'Sa cavuta oqo o Jiova ni lewe vuqa: "Dou lesu mai vei Au," me vaka sa dau tukuna o Jiova, "Au na qai lesu yani vei kemudou," sa tukuna oqo, o Jiova ni lewe vuqa.

⁴ "Dou kakua ni vakataki ira na tamamudou, era sa dau vosa kina o ira na parofita e liu ka vaka, 'Sa tukuna o Jiova ni lewe vuqa: "Dou lako tani mai na nomudou i tovo ca kei na nomudou cakacaka ca." Ia era sa bese ni rogoca se via kila i Au," sa tukuna o Jiova.

⁵ "O ira na tamamuni, sai vei o ira? Kei ira na parofita, era sa bula tikoga me sega ni mudu?

⁶ Io, sa ka dina, na Noqu vosa, na Noqu i lesilesi o koya Au sa vakarota vei ira na noqu tamata na parofita, Era sa sega beka ni ra cici siviti ira na Tamudou? "Era sa lesu mai ka cavuta tikoga: 'Me vaka ga sa nakita tiko o Jiova ni lewe vuqa me cakacaka vei keimami, me vaka na neimami valavala kei na neimami cakacaka, sa cakava dina ga me vakakina.'"

⁷ Ena i ka ruasagavulu ka va ni siga ni ka tinikadua ni vula, na vula o Sepate, ena i karua ni yabaki nei Taraiasi, sa yaco mai na vosa i Jiova vei Sakaraia na parofita, na luvei Parakaia na luvei Ito:

⁸ E na bogi, io, au a raica e dua na tamata sa vodoka tiko e dua na ose damudamu, sa tu cake tu ena kedra maliwa na veimateli ena buca; ena dakuna era sa tu kina na veiose damudamu, dravudravu kei na vulavula.

⁹ Au a qai taroga, "na noqu Turaga, na cava sara mada oqo?" Na agilosu o koya keirau a veivosaki, sa vosa vei au ka vaka, "Au na vakaraitaka vei iko na cava oqo."

¹⁰ Na tamata sa tu ena kedra maliwa na veimateli sa vosa mai ka vaka, "Sa i ira oqori era vakatalai tiko mai vei Jiova me ra veilakoyaki voli e vuravura."

¹¹ Era sa taroga na Agilosu i Jiova, o koya sa tucake tu ena kedra maliwa na veimateli ka vaka, "Keimami sa veilakoyaki voli e vuravura, ka raica o vuravura taucoko sa tiko malua."

¹² Na Agilosu i Jiova sa vosa ka vaka, "I Jiova ni lewe vuqa, me vakacava soti na dede ni Nomuni sega ni yalololoma vei Jerusalemi kei na vei koro e Juta, o ira o ni sa cudruva tiko ena vitusagavulu na yabaki sa oti oqo?"

¹³ O Jiova sa sauma vua na agilosu sa tarogi au tiko ena vosa vinaka kei na vosa ni veivakacegui.

¹⁴ Sa vosa vei au na agilosu ka vaka, "Mo vakarogotaka vaka oqo, 'Sa cavuta oqo o Jiova

ni lewe vuqa: "Au sa vuvutaki Jerusalemi kei Saioni ena loma katakata levu.

15 Au sa rui cudru vakalevu vei ira na matanitu wale; Au a cudru vakalailai ga, era sa veivukeOia ena i naki cala ga."

16 'O koya oqo sa vosa kina o Jiova ka vaka: "Au sa lesu tale ki Jerusalemi ena loloma levu; sa na tara tale na Noqu vale," sa tukuna vaka oqo o Jiova ni lewe vuqa, "E dua na wa ni vakarau e na vakadreti e Jerusalemi taucoko mai vua na daunivakarau."

17 "Mo vakarogotaka talega oqo ka vaka, 'Sa cavuta oqo o Jiova ni lewe vuqa: "Sa na vakatetei tale yani na Noqu veikoro na tiko sautu, Ena vakacegui Saioni tale o Jiova, Ena digitaki Jerusalemi tale o Koya.""

18 Au sa rai cake ka raica e va na i leu davui.

19 Au a vosa vua na agilosu e a vosa vei au, "Na cava oqo?" sa tukuna mai vei au. "Oqo na i leu e a vakatolosevi ira na Juta, na Isireli, kei Jerusalemi."

20 Sa qai vakaraitaka vei au o Jiova e va na liga ni matai.

21 Au a vakaraitaka yani ka vaka, "Na cava me ratou mai cakava oqo?" Sa sauma mai o koya ka vaka, "Sai iratou na i leu oqo, e ratou a vakatolosevi Juta, ka sega ni dua e bau vakaduri ulu cake; e ratou sa lako mai me vakarerei ira, ka vakadruka na veileu ni veimatanitu e ra sa vakaduria cake na nodra dui i leu me veivala kei Juta me vakatoloseva talega."

CHAPTER 2

Au a rai cake ka raica, e dua na tamata sa taura tiko e dua na wa i vakarau e ligana.

2 Au a taro yani, "O lako tiko ki vei?" Sa sauma mai ka vaka, "Me'u vakarautaki Jerusalemi, me'u raica ka kila na kena raraba kei na kena balavu."

3 E dua na agilosu e a vosa vei au, sa lako yani; sa lako tale mai e dua me mai sotavi koya,

4 Sa tukuna tale mai, "Vakatotolo, tukuna vua na cauravou, 'O Jerusalemi ena sega me vaka, e dua na koro sa sega na kena bai, baleta ni sa levu na tamata kei na manumanu.

5 'O'i au,' sa tukuna o Jiova, 'Au na bai bukawaqa vakavolivoliti Jerusalemi, oi Au talega na kena i ukuuku ena kedra maliwa.'"

6 "Tucake, tucake! Dou dro tani mai na vualiku," sa tukuna o Jiova; "Ni'u a caturaki kemudou tani yani me vaka na mata ni cagi vava ni lomalagi," sa tukuna o Jiova.

7 "Tucake, Saioni, dro tani, oi kemudou sa tiko vata kei ira na goneyalewa ni Papiloni."

8 Sa tukuna o Jiova ni lewe vuqa, "Sa talai au mai o Koya ni oti na i ukuuku, ki vei ira na veimatanitu era a valalolomataki iko; o koya sa tarai iko, sa tara tiko na loa ni yaloka ni Matana.

9 "E dina, Au na kuretaka na ligaqu vei ira. Era sai toki ni valu vei ira na nodra dauveiqaravi, dou na qai kila kina ni sa talai Au mai o Jiova ni lewe vuqa.

10 "Dou sere ka reki oi kemudou na goneyalewa ni Saioni! Au sa lako tiko mai me'u mai tiko ena kemudou maliwa," sa tukuna o Jiova.

11 "E levu na veimatanitu era na gole ki vua, ena siga o ya, era na yaco me Noqu tamata. Au na tiko ena kedra maliwa. Dou na qai kila ena siga o ya, ni sa talai Au mai o Jiova ni lewe vuqa.

12 "O Jiova, ena taukeni Juta me nona i votavota ena vanua tabu, ka na digitaki

Jerusalemi talega.

13 "Mo ni tiko lo na tamata talega e na mata i Jiova, sa vakayadrati o Koya mai na Nona i tikotiko tabu!"

CHAPTER 3

Sa vakaraitaki vei au o Josua na bete levu ni tucake tu ena mata ni Agilosu i Jiova kei Setani sa tu cake tu ena yasana i matau me boleli koya.

2 Sa vosa o Jiova vei Setani, "sa vunauki iko o Jiova, Setani! O Jiova, o koya sa digitaki Jerusalemi sa vunauki iko! Sa sega ni o koya oqo na tabana sa kau tani mai na bukawaqa?"

3 O Josua sa vakasulumi tu ena i sulu duka, ka sa tucake tu ena mata ni Agilosu.

4 Sa vosa o Jiova ka tukuna vei ira sa tu vata kei Josua, "Dou kauta tani na i sulu duka mai vei koya." Sa gole vei Josua ka vaka, "Raica Au sa kauta tani na nomu i valavala ca Au sa vakaisulutaki iko ena i sulu sau levu."

5 Au a tukuna, "Me ra vakaisalataki koya ena i sala savasava ki na uluna." Era sa vakaisalataki koya ena i sala savasava, ki na uluna, era sa vakaisulutaki koya ena i sulu vou. Na agilosu i Jiova sa tucake tu vakavoleka.

6 Na Agilosu i Jiova sa vakadreli Josua ka vaka,

7 "Sa tukuna o Jiova ni lewevuqa: 'Kevaka o na lako tiko ena Noqu sala, Kevaka o na maroroya tiko na Noqu i vakaro, O na lewa na Noqu vale, O na lewa talega na Noqu loma ni bai; Au na solia vei iko na vanua mo lako kina ena kedra maliwa sa tu kina.

8 'Mo rogoca Josua na bete levu, o iko kei ira talega sa tiko kei iko, o ira oqo sa i vakatakilakila vinaka; Mo kila, Au na kauta mai na Noqu tamata na TABANA.

9 E dina, na vatu Au a biuta ena mata i Josua: ena vatu o ya sa tiko kina e vitu na mata, Au na ceuta kina na vei vosa,' sa tukuna o Jiova ni lewe vuqa, 'Au na kauta tani na nodra i valavala ca na lewe ni vanua, ena dua na siga oqo.

10 E na siga o ya,' sa tukuna o Jiova i lewevuqa, 'na tamata yadua ena sureta na wekana ena ruku ni nona vaini kei na vuku ni nona vu ni lolo."

CHAPTER 4

Na agilosu e a vosa vei au, sa Iesu tale mai ka vakayadrati au, me vaka e dua na tamata sa vakayadrati mai na nona moce.

2 Sa tukuna mai vei au, "Na cava o sa raica?" "Au a vakararai tiko, sa dua nai tutu ni cina koula vinaka sara vata kei na bilo e delana, ena kena i tutu sa vitu na cina ena vitu na paipo ki na veicina.

3 "Sa tu ena yasana e rua na vuni olive, dua kina dua na yasana, ena i matau kei na yasana i mawi."

4 Au sa vosa vua na agilosu sa vosa vei au ka vaka, "Na cava oqo noqu turaga?"

5 Sa sauma vei au na agilosu ka vaka, "O sa sega ni kila oqo?" Au sa sauma, "E sega, au sa sega ni kila."

6 Sa tukuna vei au o koya: "Oqo na vosa i Jiova vei Serupepeli: 'Sa sega ena kaukauwa, sa sega ena qaqa, ena Yaloqu ga,' sa tukuna o Jiova ni lewevuqa.

7 'O cei o iko na ulunivanua, ena matai Serupepeli mo lolovira mai! Ena kauta mai o koya na vatu mei vakadei kei na kena kailavaki kina, na loloma! na loloma!""

⁸ Sa yaco tale mai vei au na vosa i Jiova ka vaka:

⁹ "Na liga i Serupepeli sa vakadavora na yavu ni vale ni soro oqo; ena ligana talega ena vakaoti kina na vale oqo. Dou na qai kila kina, ni sa talai au mai vei kemudou, o Jiova ni lewe vuqa.

¹⁰ O cei sa beca na veisiga ni ka lalai oqo? O iratou na matani cina e vitu oqo, e ratou sa reki ni ratou sa raica na paipo mai na liga i Serupepeli. Na cina e vitu oqo sa mata ni Kalou sa veiciciyaki e vuravura taucoko."

¹¹ Au a vosa vei koya ka vaka, "Na cava na vuniolive e rua oqoOdua ena yasana i matau ni tutu ni cina ka dua ena i mawi?"

¹² Na cava talega na taba ni olive e rua oqo, "Ka rau sema tiko yani ki na paipo koula ka vakadrodroi tiko yani kina na waiwai koula?"

¹³ A sa tarogi au mai o Koya, "O sa sega dina ni kila se sa cava dina oqo?" "Sa sega na noqu turaga, au a sauma yani."

¹⁴ Sa qai tukuna mai o koya, "Sai rau oqo nai i lumuti ni Kalou ni vuravura taucoko, sa tu voleka sara vua."

CHAPTER 5

Au a vuki ka veiraiyaki tiko, au a qai raica e dua nai vola vivigi sa veivukayaki voli.

² Sa qai vosa mai vei au, ka taroga, "Na cava o sa raica?" Au sa sauma ka vaka, "E dua nai vola vivigi sa veivukayaki tiko."

³ Sa qai tukuna mai vei au. "Oqo na ka ca ena lako yani ki vuravura taucoko: 'O ira kece na daubutako, era na vakatalai tani,' me vaka na veika sa tiko ena yasa ni vola vivigi oqo; 'O ira kece sa cavuta na ka lasu, era na vakatalai tani,' me vaka na veika kece sa volai ena tiki ni vola vivigi ka dua."

⁴ "Au na tala yani na veika caca oqo," sa vakaraitaka o Jiova ni lewe vuqa; "Ena curuma yani na nona vale na daubutako kei koya sa vosa vakai lasu ena vuku ni Yacaqu. Ena tiko ena loma ni nona vale, ka na kani koya tiko, vata kei na kau kei na vatu."

⁵ Na agilosu keirau dau veivosaki tiko sa vosa mai vei au ka vaka, "Mo vakararai yani ka raica na cava sa yaco oqo."

⁶ Au a taro yani, "Na cava?" Sa sauma mai ka vaka, "E dua na sova sa veitosoyaki voli." "Oqo nai vakaraitaki e vuravura taucoko:

⁷ "Oqo nai sogo sa dolavi ka sa tiko e loma ni sova e dua na yalewa sa dabe tiko";

⁸ Sa tukuna mai vei au, "Oqo nai valavala ca levu!" Sa qai sosomaka na yalewa ena loma ni sova, sa qai sogota na sova ena i sogo kaukamea.

⁹ Au a qai raica, e rua na yalewa e rau sa lako vata mai na cagi ena tabadrau; ni sa rui ka levu na tabadrau, e rau sa vukataka cake na sova ki na veimama kei vuravura kei lomalagi.

¹⁰ Au a taroga na agilosu ka vaka, "E rau sa kauta tiko ki vei na sova?"

¹¹ Sa sauma mai vei au o koya, "Me la'ki tara na vale me tiko kina e na vanua o Saina: ni sa oti, na sova ena vakaitikotiko mai kea."

CHAPTER 6

Au a vuki me'u rai, au sa raica e va na qiqi ni ratou sa lako tiko mai na tadrúa ni ulunivanua e rua, na ulunivanua sa ulunivanua ni vei varasa.

² Na i matai ni qiqi sa muria na ose damudamu, Na i karua na qiqi sa muria na ose loaloa,

³ Na i katolu ni qiqi, na ose vulavula. Na i ka va ni qiqi na ose veivolavolaiOqai kaukauwa.

⁴ Au a vosa vua na agilosí ka taroga, "Na cava oqo, na noqu turaga?"

⁵ Sa sauma mai na agilosí, "Sai iratou oqo na va na yalo vakalomalagi, ka ratou sa lako mai na nodratou i tikotiko mai vua na Kalou kei vuravura taucoko.

⁶ "Na qiqi kei na ose loaloa sa lako vaka ki na veivanua vakavualiku, sa muri koya na vulavula ia, na kena volavola i, sa lako vaka ki na veivanua vaka ki na ceva."

⁷ Na ose kaukauwa sa lako yani ka nanamaki, ka me ratou sa veilakoyaki yani ki vuravura taucoko. Sa tukuna mai na agilosí, "Lako mo veilakoyaki yani ki vuravura taucoko, era sa veilakoyaki yani ki vuravura taucoko.

⁸ Sa qai kacivi au mai, ka tukuna, "Raica o iratou sa gole yani ki na vualiku, e ratou sa vakaceguya na yaloqu ena veivanua vaka ki na vualiku."

⁹ Sa yaco mai vei au na vosa i Jiova ka vaka:

¹⁰ "Mo taura nai loloma, na i solisoli mai vei ira na bobulaOmai Elitai, mai Topaisa, mai Jitaia o ira sa lako mai PapiloniOena siga vata ga o ya e ra sa la'ki curuma na vale nei Josaiá, na luve i Sefanaia.

¹¹ "Taura na siliva kei na koula, ka cakava e dua nai sala me vaka na kena i vakarau, ka vakaisalataki Josua kina na luvei Josateki na bete levu.

¹² "Mo vosa vei Josua ka vaka, 'Sa tukuna vaka oqo o Jiova ni lewe vuqa: "Na Tamata sa vakayacani na TABANA! Mai na Nona i tikotiko sa vakatabana yani, Ena tara o Koya na Vale i Jiova;

¹³ Io, ena tara o Koya na Vale i Jiova. Ena vakavuna o Koya na kena lagilagi Ena dabe ka lewa mai na Nona i tikotiko Vakaturaga. Ena bete levu talega ena Nona i tikotiko vakaturaga, Nai vakavuvuli ni veisaututaki ena tiko ena kedrau maliwa."

¹⁴ "Nai sala vakaturaga me sa dua nai vakananumi ena vale ni Kalou vei iratou o Elimi, o Topaisa kei Jitaia kei Eni na luve i Sefanaia.

¹⁵ "O ira mada ga sa tiko vakayawa, era na lako mai ka tara na vale i Jiova.Dou na qai kila ni sa talai Au mai o Jiova ni lewe vuqa ki vei kemudou. Oqo, e na yaco dina ga, kevaka dou sa talairawarawa ki na domo i Jiova na nomudou Kalou."

CHAPTER 7

Nai ka va ni yabaki nei Taraiasi na Tui, sa yaco sara mai vei Sakaraia na vosa i Jiova ena i ka va ni siga ka ciwa ni vula, na vula o Kisiliu,

² E rau sa talai o Saresa kei Rogemi Meleki kei ira na tamata ki na vale ni Kalou me ra masu ena mata i Jiova,

³ Ka me tarogi talega se o cei e sa tiko ena vale i Jiova, sa vosa mai na parofita ka vaka, "e dodonu beka me'u tagi ka lolo ena i ka lima ni vula me vaka au sa dau cakava ena gauna sa oti?"

⁴ Sa yaco mai vei au na vosa i Jiova ka vaka,

⁵ "Tukuna vei ira na tamata ena vanua, kei ira na bete: 'Ni dou sa lolo ka vakaloloku ena i ka lima kei nai ka vitu ni vula ena loma ni vitusagavulu na yabaki, dou sa lolo dina tiko li vei Au?

⁶ 'Ena gauna dou sa kana ka gunu kina, dou sa sega beka ni kana ka gunu ena

vukumudou ga?

⁷ 'E dodonu mo dou a rogoca ka talairawarawa ki na vosa ni Kalou ena gusudra na parofita ena gauna se sega tiko kina o Jerusalemi kei na vo ni veikoro era se vuavuai kina, na veivanua talega ena Ceva kei na vanua lolovira era sa sega tu?"

⁸ Sa yaco tale mai vei Sakaraia na vosa i Jiova ka vaka,

⁹ "Sa tukuna o Jiova ni lewe vuqa: 'Dou vakadavora na lewa dodonu, dou vakaraitaka na yalololoma kei na veilomani na tamata yadua vua na tacina.

¹⁰ 'Me ra kua ni vakasaurarataki na vada, na luveniyali, na kaitani, na dravudravua, me kua ni dua e bucina na ca vua na kai nona.'

¹¹ "E ra bese ni rogoca na vosa, e ra vuki vakanadaku ka tabonaka na daligadra me ra kua ni rogoca.

¹² "Io, era sa vakaukauwataka na yalodra, era sa bese ni rogoca na i vunau, na vosa sa tala mai o Jiova ena Yalona mai vei ira na parofita e liu, sa lako mai kina na cudru katakata mai vei Jiova.

¹³ "Sa yaco kina me vaka ga sa tukuna", era sa sega ni rogoca, e ra sa qai kaci mai, Au sa sega ni via rogo yani, sa cavuta oqo o Jiova ni lewe vuqa.

¹⁴ "Au a talabusesetaki ira tani yani ena covulaca ki na veimatanitu era sa sega ni kila e liu. Sa lala mai na vanua ena vukudra, sa sega kina ni dua e lako yani se dua me lako mai; ni ra sa vakalala na vanua vinaka."

CHAPTER 8

Sa yaco tale mai na vosa i Jiova ka vaka,

² "Sa tukuna vaka oqo o Jiova ni lewe vuqa, 'Au sa loma katakata vakalevu ena vuku i Saioni, ena gagadre titobu, Au sa loma katakata e na vukuna.'

³ "Sa vosa kina o Jiova ka vaka: 'Au na lesu tale ki Saioni, ka tiko sara ga ena loma i Jerusalemi. O Jerusalemi ena vakatokai me Koro ni Dina, na Ulunivanua i Jiova ni lewe vuqa, na Ulunivanua Tabu.'

⁴ "Sa tukuna vaka oqo o Jiova ni lewe vuqa, 'O ira na turaga kei ira na marama e ra na dabe tale, ena veisalatua e Jerusalemi, Era na yadua nai titoko e ligadra ni sa levu mai na veiyabaki.

⁵ Na veisala e na koro era na sinai ena gone lalai, ni ra sa qito voli ena veisala.'

⁶ "Sa tukuna o Jiova ni lewevuqa; 'Kevaka sa vinaka ki na matadra o ira sa vo ena siga oqo, ena vinaka beka, talega ki na mataqu?' Sa vosa vaka oqo o Jiova ni lewevuqa.

⁷ "Sa tukuna o Jiova ni lewevuqa; 'Io, Au na vakabulai ira na Noqu tamata mai na tokalau, mai na ra talega;

⁸ Au na kauti ira lesu mai, era na mai tiko e loma i Jerusalemi. Era na Noqu tamata, Au na nodra Kalou ena dina kei na yalododonu.'

⁹ "Sa tukuna vaka oqo o Jiova ni lewevuqa; 'Me kaukauwa tiko na ligamudou, Oi kemudou sa vakarorogo tiko ena siga oqo, na vosa sa lako mai ena gusu ni parofita, o ira sa tiko ena siga sa yavutaki kina na vale i Jiova ni lewe vuqa, me sa tara kina na vale.

¹⁰ Ni se bera na veisiga oqo, era sa sega tu ni saumi na tamata cakacaka, sa sega talega ni saumi na manumanu ka cakacaka; sa sega talega na vakacegu vei ira na meca sa lako yani se lako mai; Ni'u sa biuta ki na tamata kecega me veimecaki kei na kai nona.

¹¹ 'Ia, oqo, Au na sega ni cakava vaka oqo, vei ira sa vo mai vei ira na Juta me vaka e liu,' sa tukuna o Jiova ni lewe vuqa.

¹² 'Ena vuavuai mai na sila, na vaini ena solia mai na vuana na qele ena solia mai na ka sa levu, o lomalagi ena vakalutuma mai na teguOAu sa lewa me ra na taukena na i vovo ni bula vei ira na Juta na vei ka kece oqo.

¹³ E na yaco mai na veika oqo, me vaka ni dou a vakaloucataki ena kedra maliwa na veimatanitu, na vale i Juta kei na vale i Isireli, Au na vakabulai kemudou, dou na vakalouvinakataki. Dou kua ni rere, dou vakaukauwataka ga na ligamudou.'

¹⁴ "Sa cavuta oqo o Jiova ni lewevuqa, 'Ni'u sa nakita me'u totogitaki kemudou, Ni ra a vakacudrui Au na nomudou qase me'u rarawa kina, ' sa tukuna o Jiova ni lewe vuqa. 'Au na sega ni veisautaka na dina o ya,

¹⁵ Oqo talega ena siga e dai, Au sa nakita me'u caka vinaka vei Jerusalemi, ki vei Juta talega. Dou kua ni rere.

¹⁶ Oqo na ka mo dou cakava, me vosa dina tiko na tamata vua na wekana, dou solia na lewa ena nomudou matamata, me dina, me dodonu, me veivakacegui.

¹⁷ Me kua ni dua e vakanananucataka na kai nona e yalona; kua ni lomana na bubului vakailasu. Na veika kece oqori, Au sa cata,' sa tukuna o Jiova ni lewe vuqa."

¹⁸ Sa yaco tale mai vei au na vosa i Jiova ni lewe vuqa ka vaka,

¹⁹ "Oqo na vosa i Jiova ni lewevuqa: 'Na lolo ni ka va ni vula Na lolo ni ka lima ni vula Na lolo ni ka vitu ni vula Na lolo ni ka tini ni vula, Ena ka ni reki ka marautaki, o sa kana magiti e taleitaki vei ira na Juta. Mo dou lomana na dina kei na vakacegu.'

²⁰ "Sa tukuna o Jiova ni lewevuqa, 'Na tamata era na lako mai, nai taukei mai na veikoro levu;

²¹ O ira nai taukei ni dua na koro, era na lako ki na dua tale na koro, ka tukuna tiko, "Me da lako cake ka masu vei Jiova, e matana, me da vakasaqarai Koya, oi au talega, au na lako cake."

²² Io, sa levu na tamata kei ira na veimatanitu kaukauwa, era na lako mai ka vakasaqara na Kalou e Jerusalemi ka masu vua na Kalou o Jiova.'

²³ "Ena siga o ya, 'Era na lewe tini na tamata mai na duivosavosa kecega e vuravura era na mai taura na liga ni nona sote e dua na Jiu ka vaka, "Me keitou lako vata kei iko, ni keimami sa rogoca ni sa tiko vata kei kemuni na Kalou.'""

CHAPTER 9

Na bibi ni vosa ni Kalou me baleta na vanua o Aterekei, kei Tamasiko na vanua ni nona vakacegu (na matadra kecega na tamata kei ira kece na Isireli sa rai tikoga vei Jiova);

² O Emaca talega sa voleka kina, o Taia kei Saitoni, e dina ga ni rau sa vuku sara.

³ O Taia sa tara voleka toka vua e dua na vale ni vakatawa. Sa binia na siliva me vaka na kuvu ni soso; Kei na koula me vaka na soso ni gaunisala.

⁴ Na Kalou ena vakatikitikitaki koya, Ena vakarusa na nona kaukauwa mai wai. Ena kani koya na bukawaqa.

⁵ Ena raica o Asekiloni, ka na rere. O Kasa talega ena rarawa vakalevu. O Ikironi, sa vakaotia na nona nanamaki Na tui, ena rusa mai Kasa O Asekiloni ena sega tale.

⁶ "E dua na kawa tamata sa veiwaki kina na kena dra sa tiko mai Asitoti Au na musuka tani na viavialevu mai Filisitia.

⁷ Au na kauta tani na dra mai na gusuna. Kei na ka ca mai na maliwa ni batina Ia, o koya ena tiko, ena tiko vua na Kalou. Ka na vaka e dua nai liuliu e Juta, Kei Ekironi ena vakataki Jepusaiti.

⁸ Au na tiko volivolita ga na Noqu vale, baleti ira na noqu mataivalu, baleti koya ga sa lako kei koya e lesu tale mai. Ena sega tale ni dua na dauveivakasaurarataki ena lakovi ira, Ni oqo, Au sa raica sara ga e Mataqu.

⁹ "Dou reki vakalevu na goneyalewa ni Saioni! Dou kaila na goneyalewa ni Jerusalemi! Dou raica, na nomudou Tui sa lako tiko mai Vei kemudou; Sa dodonu o koya ka sa tiko vua na veivakabulai Sa yalomalumalumu ka vodo lako ena yasa, na luveni yasa, io, na luveni yasa.

¹⁰ Au na musuka na qiqi mai Iferaimi, Na ose mai Jerusalemi; Na dai ni dakai ena musuka laivi Ena vosataka na veivakacegui ki na veimatanitu; Na nona lewa ena lako mai 'Ki na wasawasa ka dua ki na wasawasa ka dua, Mai na Uciwai ki nai yalayala kei vuravura.'

¹¹ "Ia o iko, ena vuku ni nomu dra ni veiyalayalati, Au na sereki ira kina na nomu kaivesu mai na qara sa sega kina na wai.

¹² Dou lesu mai ki na koro vakabai oi kemudou sa vakanuinui tiko, ena siga oqo, me vaka Au sa tukuna oti, Au na solia vei iko e rua nai votavota.

¹³ Au sa loveci Juta me Noqu dai ni dakai, o Ifereimi me kena gasau, me'u vakatuburi ira na luvemu, I Saioni, o iko Kirisi, Au na cakava mo vaka nai seleiwau vua na tamata qaqa."

¹⁴ Ena qai laukune na Kalou ena kedra maliwa, kei na gasau ni Nona dakai ena lako yani me vaka na livaliva. Na Kalou ena uvuca na biukila ka na lako me vaka na covulaca ki na ceva.

¹⁵ O Jiova ni lewe vuqa ena taqomaki ira na Nona tamata: era na vei vakalolomataki e nai rabo vatu. Era na vakasinaiti ena dra me vaka ena dari, me vaka ena tutu ni cabocabo ni soro.

¹⁶ O Jiova na nodra Kalou ena vakabulai ira ena siga o ya, me vaka ni ra sa Nona qele ni tamata, Era sa vaka na vatu talei ena i sala vakauti, Sa laveti cake me na drotini ni dua na vanua.

¹⁷ Sa rui cecere na nodra vinaka Sa rui cecere na nodra totoka! Na sila ena vakayacora na gonetagane me ra sugusugu qase, sa vakatalega kina na waini vei ira na goneyalewa.

CHAPTER 10

Kerei Jiova me solia na uca, na gauna ni uca tau e muri. O Jiova e na cakava na veio; Ena solia mai na tau ni uca, na co ena vanua me nodra kecega.

² Na matakau sa vosataka na ka lasu, O ira na daurairai era sa raica na raivotu lasu. Ka tukuna na tadra lasulasu; Sa vakailasu na nodra veivakacegui Era sa lako sese me vaka na sipi; Era sa leqa ga, ni sa sega na nodra i vakatawa.

³ "Na Noqu cudru sa lakovi ira ga nai vakatawa, Au na togotitaki ira na qele ni me. Ni na sikovi ira yani na Nona o Jiova lewevuqa, Na vuvale i Juta, ena vakayacori ira mera Nona ose vakatui ni valu.

⁴ Mai vei koya sa lako mai kina vatu ni tutu ni vale, Mai vei koya sa dei kina na vale laca, Mai vei koya sa cuva nai valu, Mai vei koya era sa duavata na veiliutaki.

⁵ Era na vaka na tamata qaqa, Era na butuka sobu na meca, e nai valu ena soso ni gaunisala, Era na vala baleta ni sa tiko vata kei ira o Jiova, O ira na dauvodo ose, era na vakamaduataki.

⁶ "Au na vakukauwataka na vale i Juta, Au na vakabula na vale i Joseva, Au na kauti ira lesu mai, baleta Ni'u sa lomani ira. Era na vaka ga e dua, a sega ni caka vua e dua na ka. Ni sai Au o Jiova na nodra Kalou, o koya ena rogoci ira.

⁷ O ira na Ifereimi era na vaka na qaqa Era na reki me vaka ena waini lo, era na raica o

ira na luvedra ka ra na marau, Na yalodra ena marau tiko vei Jiova.

⁸ Au na kalu ena vukudra ka soqoni ira vata Au na vakabulai ira; era na vakatuburi ni ra sa vakatuburi mada e liu.

⁹ "Au na vakaraitaki ira ena kedra maliwa na tamata, Era na bula, o ira talega na luvedra, Era na lesu tale mai.

¹⁰ Au na kauti ira lesu mai na vanua o Ijipita, Au na kauti ira mai na vanua o Asiria Au na kauti ira mai ki na vanua o Kiliati kei Lapanoni, me yacova ni sa sega tale na vanua e vo vei ira.

¹¹ Ena lako mai o Koya ena wasawasa vata kei veivakararawataki, Ena samuta na ua ni wasawasa: Na veititobu kece ni Uciwai ena mamaca mai. Na dokadoka nei Aisiria ena vakacuvai sobu, Na qoro kei Ijipita ena yali.

¹² "Vei Jiova era na vakakaukauwataki kina, era na lako cake ka lako sobu ena Yaca i Jiova," sa tukuna o Jiova.

CHAPTER 11

O iko Lapanoni, dolava na nomu katuba, Na bukawaqa ena kania na nomu sitari.

² Dou tagi na vei damanu ni ra sa bale na vei sitari, era sa vakacacani na veivunikau. Kemudou na oki mai Pasani, na veivunikau vavaku era sa davo.

³ Sa rorogo na domo ni nodra tagi na i vakatawa! Na nodra lagilagi sa vakacacani. Sa rorogo na nodra tagikudru na laioni! Ni sa vakacacani na nodra dokadoka na Joritani.

⁴ Sa tukuna o Jiova na noqu Kalou, "Vakani ira na qele ni sipi me ra vakamatei,

⁵ "Era sa vakamatei mai vei ira na kena i taukei, ka ra sa vakalecalecava tu ga; era sa tukuna tikoga, 'Me vakalouvinakataki o Jiova ni ra sa volitaki sipi tiko, e ra sa vutuniyau,' o ira na i vakatawa era sa sega ni via kawaitaka.

⁶ "Au na sega ni via kauwaitaki ira sa vakatawa tiko, na vanua," sa tukuna tale o Jiova ni lewe vuqa, "Ia, Au na soli ira yani ki vei ira na kai tani, ki vei ira na kena tui. Era na valuta na kena vanua, Au na sega ni vakabulai ira mai na ligadra."

⁷ Au sa vakani ira na qele ni sipi me ra vakamatei, vakabibi o ira na dravudravua. Au sa taura e rua na kau: e dua sa vakatokai o Matavinaka, na kena i karua o Veivesuki. Au sa vakania na qele ni sipi.

⁸ E na loma ni dua na vula, Au sa vakasukai iratou e tolu na i vakatawa. Na yaloqu sa cudruvi ira kei ira talega sa cati au.

⁹ Au sa tukuna kina, "Au na sega ni vakani kemudou. Me mate na ka e dodonu me mate ka me rusa na ka e dodonu me rusa, o ira sa vo mera veikani vaka taki ira."

¹⁰ Au sa qai taura na noqu i titoko o Matavinaka ka musuka rua, me rawa kina ni'u musuka rua na veiyalayalati Au sa vakayacora vei ira na tamata.

¹¹ Sa qai voroki ena siga o ya. O ira na dravudravua ni noqu tamata e ra sa vakaraici au tiko, era sa kila, ni oqo na vosa ga i Jiova.

¹² Au sa qai tukuna vei ira, "Kevaka sa dodonu mai keri, solia mai na kequ i sau, kevaka sa sega mo suka yani." Era sa qai vakarautaka na kequ i sau e tolusagavulu na tiki ni siliva.

¹³ Sa tukuna mai vei au o Jiova, "Viritaka na ka oqori vei koya na dau buli bilo" Onai sau sa vakarautaki vei au, Au sa qai taura na tolusagavulu na tiki ni siliva ka viritaka yani ki na loma ni vale ni Kalou me nona na dau buli bilo.

¹⁴ Au sa musuka rua tale na karua ni titoko o Veivesuki, me'u voroka kina nai vau ni

veitacini nei Juta kei Isireli.

15 Sa tukuna mai vei au o Jiova, "Taura mada oqo vei iko, mo kila mada ke sa dua nai vakatawa lialia.

16 "Io, Au na vakatura cake e dua nai vakatawa ena vanua, o koya era sega ni kauwaitaki ira sa yali, se, nodra maroroi, se na nodra vakani na kena vovo ni bula. Ia, era sa dau kania ga na lewedra, kania na kena uro, ka basubasuraka vakalalai na yavadra kei na ka kecega.

17 "Dou na ca nai vakatawa sega yaga, ni dou sa dau biuti ira na qele ni sipi! Nai sele ena kania na matamu i matau kei na ligamu talega; na ligamu ena malai mai kei na matamu ena boko mai."

CHAPTER 12

Na kena bibi na vosa i Jiova vei ira na Isireli, oqo na vosa i Jiova, o koya sa dedeka na lomalagi, sa vakadavara na yavu kei vuravura ka bulia vua na tamata na yalona sa tiko e lomana:

2 "Raica, Au na vukici Jerusalemi me nodra bilo ni mateni na tamata vakavolivoliti koya, ni ra sa tu vakarau me valuti Juta kei Jerusalemi.

3 "Ena siga o ya Au na vakayacori Jerusalemi me vaka e dua na vatu bibi vei ira na tamata kece; o ira kece era via laveta laivi era sa tovata mai na matanitu kece e vuravura.

4 "Ena siga o ya, sa tukuna tiko o Jiova, Au na vakasesei ira kece na ose, era na lialia mai na dauvodo ose; Au na rai tiko ki na vale i Juta, Au na samuti ira kece na ose me ra mataboko.

5 "O ira kece na kovana e Juta era na tukuna ki lomadra, 'O ira kece na kai Jerusalemi era sa noqu kaukauwa ena Turaga o Jiova ni lewe vuqa na nodra Kalou.'

6 "Ena siga o ya, Au na cakava vei ira na kovana e Juta me ra vaka na tavuteke ena dela ni buka, era sa vaka na cina waqawaqa ena kau sa davo tu, era na kani ira kece na tamata tu volivolita ena yasana i matau kei nai mawi talega, o Jerusalemi ena taura tale, ena kena vanua ga, - Jerusalemi.

7 "O Jiova ena vakabula e liu na vei vale laca e Juta, me kilai kina ni lagilagi na kai Jerusalemi ena sega ni levu mai vei Juta.

8 "Ena siga o ya o Jiova ena taqomaki ira na kai Jerusalemi, o koya sa malumalumu ena vakataki Tevita, na vale nei Tevita era vaka na Kalou, ena vaka na agilosu ni Kalou e matadra.

9 "Ena siga o ya, Au na raica na nodra vakarusai na matanitu kecega sa via veivala kei Jerusalemi.

10 "Au na sovaraka ki na vale i Tevita, kivei ira na i taukei e Jerusalemi na yalo ni yalololoma kei na yalomalumalumu; era na qai rai mai vei Au, o koya ga era a coka, era na tagicaki Koya me vaka sara ga na nodra tagicaka na nodra ulumatua sa mate.

11 "E na siga o ya ena dua na veitagicaki levu e Jerusalemi, me vaka na veitagicaki levu e Etati Rimoni mai na bula o Mikitoni.

12 "Era na tagi vakararawa kecega na vuvale, na vuvale i Tevita, o ira na dui watidra, na vuvale nei Nacani kei ira na dui watidra;

13 "O ira na kawa ni vuvale vaka Livai, o ira na dui watidra, o ira na vuvale nei Semei, kei ira na dui watidra;

14 "O ira kece na vuvale sa vo, o ira kece vakayadua kei ira na dui watidra.

CHAPTER 13

"Ena siga o ya, ena dola e dua nai vurevure ki na vale i Tevita, ki vei ira talega nai taukei e Jerusalemi, me baleta nai valavala ca kei na dukadukali.

² "Ena siga o ya," sa tukuna o Jiova ni lewe vuqa, "Au na musuka laivi na yacadra na matakau kecega ena vanua, era na sega ni nanumi tale, Au na vakavuna vei ira na parofita kei ira na yalo ca, me ra lako tani mai na vanua.

³ "Ena yaco mai na gauna, ke vaka e se parofisai tiko ga e dua, oi rau na tamata kei na tinana e rau vakatuburi koya, e rau na tukuna vua, 'Sa sega ni dodonu mo bula, baleta ni o sa vosataka tiko na lasu ena yaca i Jiova,' E rau na viritaki koya ena gauna sa na parofisai kina.

⁴ "Ena siga o ya, o ira na parofita kece era na maduataka na nodra dui raivotu ni ra sa parofisai mai: era na sega ni daramaka tale mai na nodra i sulu ni veivakaisini.

⁵ "Era na tukuna dina mai, 'Au sa sega ni parofita, o au e dua ga na dauteitei; au a vakavulici me'u raica na manumanu, mai na gauna au se cauravou kina.'

⁶ "E dua ena tarogi koya, 'Na mavoa cava sa tiko oqori e ligamu?' Ena sauma o Koya, 'Oqo na mavoa mai na nodra vale na noqu i tokani.'

⁷ "Mo yadra mai, nai seleiwau, ena vuku i koya na Noqu Vakatawa, Ena vuku i Koya na Noqu i Tokani," Sa tukuna Jiova ni lewe vuqa, "Samuta nai Vakatawa, era na qai kabuwacara na sipi; Au na qai vuki ka vakatauca na Ligaqu vei ira na lalai.

⁸ Ena yaco oqo ki na vanua taucoko," sa tukuna o Jiova ni lewe vuqa, "Ni rua nai ka tolu ena vanua, era na musuki laivi ka vakamatei, era na biu tiko ga e dua nai ka tolu:

⁹ Au na kauti ira mai na dua nai katolu oqo ena bukawaqa, Au na vakasavasavataki ira me vaka sa vakasavasavataki na siliva, ka vakatovolei ira me vaka sa vakatovolei na koula. Era na kaciva mai na Yacaqu, Au na qai rogo yani, Au na tukuna 'Ni o ira oqo na Noqu tamata,' ka ra na tukuna talega, 'O Jiova sa neimami Kalou.'"

CHAPTER 14

Dou raica na siga i Jiova sa lako tiko mai, nai toki ni valu ena wasei ena kemudou maliwa.

² Au na vakasoqoni ira mai na veimatanitu me ra veivala kei Jerusalemi; Na koro ena tauri, Na veivale ena butakoci, O ira na marama era na vakacacani. Na veimama ni tamata era na kau vakavesu, O ira ga na kena vo ni tamata, era na sega ni kau tani mai na koro.

³ Ena lako yani o Jiova ka valuti ira na veimatanitu, me vaka ni na vala o Koya ena gauna ni valu.

⁴ Ena siga o ya na yavana ena tucake tu ena Ulunivanua ni Veiolive, na yasana sa donu i Jerusalemi ena tokalau na Ulunivanua ni Veiolive ena tawase rua mai na tokalau ki na ra, ena bulia e dua na buca levu; veimama ni ulunivanua ena lako vaka ki na vualiku, veimama vaka ki na ceva.

⁵ Dou na qai dro ki na buca levu ni ulunivanua wasei oqo, na buca oqo ena yaco sara ki Asali. Io, dou na dro, dou na dro mai na tavuki ni vanua levu oqo, ena gauna i Usaia na tui Juta. Ena qai lako mai o Jiova na noqu Kalou, kei ira kecega na Nona tamata digitaki vata kei Kemuni.

⁶ Ni sa oti na veisiga o ya, ena dro na rarama Na rarama ena sega sara.

⁷ Ena dua na siga sa kila ga o Jiova Ena sega na siga se na bogi, ni sa yakavi mai, sa na

yaco me raramasese tikotikoga.

⁸ Ena siga o ya, sa na yaco me drodro tiko ga mai na wai ni bula mai Jerusalemi, veimama ki na wasawasa ena tokalau, ka veimama ki na wasawasa vaka ra.

⁹ O Jiova sa na Tui e vuravura taucoko, Ena siga o ya "Sa na dua ga na Kalou," Sa na dua talega na yacana, o Jiova ga.

¹⁰ Na vanua kece sa na vuki me dua na buca levu, mai Kipa ki Ramoni na ceva kei Jerusalemi. O Jerusalemi ena vakaceceretaki, ka na tawani mai na Matamata nei Penijamini ki na Matai ni Matamata, na Matamata ena Tutu talega, mai na Vale Cecere nei Ananeli, ki na vanua ni butu waini.

¹¹ Era na tiko kina na tamata, ena sega tale na ka e veivakacacani. E ra na tiko dei na tamata e Jerusalemi.

¹² Sa dua na ka ca levu oqo, ni samuti ira kece na tamata sa veivala kei Jerusalemi o Jiova. Sa luca mai na yagodra ni ra se tucake tu ena yavadra, Na yaloka ni matadra sa kino yani ki loma ka sa yali yani, Na yamedra sa yali ka waicala ga e gusudra.

¹³ Ena yaco mai na veisiga oqo, e dua na veilecayaki levu sa tala mai na Kalou vei ira oqo. Na tamata yadua ena vesuka na ligai na wekana, ka laveta na ligana vakai koya vua na wekana na vesuki tu;

¹⁴ O Juta talega ena vala e Jerusalemi. Ena kumuni vata na nodra i yau na veimatanitu kecega, era na kumuna vata na koula, na siliva na i sulu sa rui levu sara.

¹⁵ Na ca levu ena tarai ira talega na ose, na meule, na kameli kei na asa kei ira kecega na bulumakau era sa tiko ena vanua. E na tarai ira na na ca levu oqo.

¹⁶ Ena yaco mai na gauna vei ira sa vo mai na veimatanitu ena nodra veivala kei Jerusalemi, era na lako cake ena veiyabaki me lotu vua na Tui o Jiova ni lewe vuqa ka maroroya na Solevu ni vale vakacevaceva.

¹⁷ O ira vakayadua na vuvala sa sega ni lako cake ki Jerusalemi me lotu vua na Tui, o Jiova ni lewevuqa, sa na sega ni tau vei ira na uca.

¹⁸ Kevaka era sa sega ni curu mai na vuvala mai Ijipita, ena sega ni tau vei ira na uca. E na basika vei ira na dauvakacaca ena vei samuti kina o Jiova vei ira na veimatanitu ni ra sa sega ni maroroya na kana vata ni vale vakacevaceva.

¹⁹ Oqo nai totogi ena soli vei Ijipita kei ira na veimatanitu, ni ra sa sega ni lako cake mai me maroroya na kana vata ni vale vakacevaceva.

²⁰ Ena siga o ya "SA KA TABU O JIOVA" ena ceuti ena ketedra na ose kece. Na kuro kece ena vale i Jiova ena vaka na bilo e nai cabocabo ni soro.

²¹ Io, na bilo kece e Jerusalemi kei Juta era na ka tabu kece vei Jiova ni lewevuqa, o ira kece sa mai vakacaboi soro era na mai taura ka vakasaqa. Ena siga o ya, ena sega na kai Kenani ena vale i Jiova ni lewe vuqa.

For other languages please go to www.wordproject.org